

आकाशवाणी जयपुर-अजमेर
प्रादेशिक समाचार
दिनांक 03.09.2024 समय: 18.45 बजे

- उपमुख्यमंत्री दिया कुमारी जयपुर मांय हवा महल सामी फोटो पॉइंट बणावण अर जल महल मांय नावां चलावण बाबत् हुकम दीना।
- पदोन्नति अर भर्ती बोर्ड पुलिस कॉन्स्टेबल भर्ती परीक्षा-2023 रा नतीजा रो ऐलाण कीनो।
- भारतीय वायुसेना रा जोधपुर एयरबेस माथे चाल रह्या मेगा मल्टीलेटरल युद्धाभ्यास तरंगशक्ति: 2024 रा तहत वायुसेना री सूर्यकिरण एरोबेटिक टीम आज जोधपुर पूगी।
- प्रदेश मांय कठे-कठे भारी बिरखा-बांसवाड़ा जिला रा भूंगड़ा मांय सब ऊं बत्ती 115 मिलीमीटर बारिश दर्ज करीजी- माही बंधा रा चार दरुजा खोली ज्या।

000

जयपुर मांय ऐतिहासिक हवा महल रे सामी फोटो खींचण री ठौड़ विकसित करी जावेला। उपमुख्यमंत्री दिया कुमारी ई सारू अहलकारां ने हुकम दीना है। वे आज जयपुर रा चारदीवारी हलका अर सैर-सपाटा री निजर ऊं खास ठौड़ां रो दौरो कीनो। दिया कुमारी त्रिपोलिया गेट, छोटी चौपड़ अर किशनपोल बाजार समेत खास बाजारां अर जल महल ऊं आमेर मावठा ताई रा हलका रो दौरो कीनो अर बेतरतीब तरीका ऊं लाग्योड़ा तारां ने हटावण रा हुकम दीना। वे किशनपोल बाजार रा महाराजा स्कूल ऑफ आर्ट अर जल महल री पाल ने ओजू विकसित करण रा हुकम ई दीना। उपमुख्यमंत्री कह्यो के गुलाबी नगर मांय जर्जर इमारतां ऊं जुड़ी जरूरी कार्रवाई करी जावेला। वे कह्यो के जयपुर मांय सैलानियां रा सुबीता सारू खास बसां चलायी जावेला।

.....

विश्व बैंक चालू माली साल मांय भारत री माली विकास दर रो अनुमान छह दशमलव छह फीसदी ऊं बधा र सात फीसदी कर दियो ज्यो है। बैंक रे मुजब देश री माली बरकत निजी खपत अर निवेश सरीखा कारणां ऊं मजबूत बणी रेहवेला। अंतरराष्ट्रीय मुद्रा कोष-आईएमएफ ई चालू माली साल सारू भारत रा सकल घरेलू उत्पाद-जीडीपी रा विकास री रेट मांय बधोतरी रो अंदाजो लगायो है।

00000

राष्ट्रपति द्रौपदी मुर्मू स्कूल-कॉलेजां मांय टाबरियां सारू हिफाजत रो माहौल तय करण माथे जोर दीनो है। वे आज महाराष्ट्र रा पुणे मांय एक गैर-सरकारी विश्वविद्यालय रा दीक्षांत समारोह मांय बोल रही ही। राष्ट्रपति कह्यो के देश री महिलावां हर हलका मांय आगे बढ़ रही है अर नारी शक्ति रो विकास देश सारू माथो ऊंचो करण री बात है।

000

देश मांय पौधा रोपण रा अभियान एक पेड़ माँ के नाम रा तहत हाल ताई 52 करोड़ ऊं बत्ता पौधा रोप्या जा चुक्या है। पर्यावरण, वन अर जलवायु परिवर्तन मंत्री भूपेन्द्र यादव सोशल मीडिया पोस्ट रे जरिये आ जाणकारी दीनी। वे कह्यो के विश्व पर्यावरण दिवस रे मौके प्रधानमंत्री नरेंद्र मोदी ई अभियान री सरुआत करता थकां सगळा ऊं आप-आप री मां रा नाम ऊं एक-एक पौधो लगावण री अरज कीनी ही।

000

पदोन्नति अर भर्ती बोर्ड, पुलिस मुख्यालय जयपुर सिपाहियां री भर्ती सारू लीरीजी परीक्षा रा नतीजा रो ऐलाण कर दीनो है। अतिरिक्त पुलिस महानिदेशक सचिन मित्तल आ जाणकारी दीनी। वे बतायो के पास व्ह्या उम्मीदवारां री लिस्ट विभाग री वेबसाइट माथे अपलोड कर दीरीजी है। वे बतायो के कम्प्यूटर आधारित परीक्षा मांय पास व्ह्या सिपाही चालक, घुड़सवार, श्वानदल अर

सिपाही बैण्ड ओहदा सारू दक्षता परीक्षा बेगी ई रेंज मुख्यालय स्तर माथे ली जावेला। वे बतायो के 3 हजार 578 ओहदां सारू भर्ती परीक्षा 13 अर 14 जून ने लीरीजी ही।

00000

विधानसभा अध्यक्ष वासुदेव देवनानी राज्यपाल हरिभाऊ किसनराव बागडे सागे आज शिष्टाचार भेंट कीनी। ई दौरान देवनानी राज्यपाल ने विधानसभा कानी ऊं छापी ज्यी नुवा साल री डायरी अर सदन मांय करीज्या नवाचारां री जाणकारी देवण वाळी पोथी राज्यपाल ने भेंट कीनी।

000

वायुसेना रा जोधपुर एयरबेस माथे चाल रह्या मेगा मल्टीलेटरल युद्धाभ्यास तरंगशक्ति: 2024 रा तैत वायुसेना री सूर्यकिरण एरोबेटिक टीम 9 किरण हॉक जहाजां सागे आज जोधपुर पूगी। सूर्यकिरण टीम 7 सितम्बर ने एयरबेस माथे करतब बतावेला। सूर्यकिरण रा 9 जहाज गुप कैप्टन गुरप्रीत सिंह दिल्लीन री अगुवाई मांय करतब बतावेला। करीब 300 किलोमीटर प्रति घंटा री रफतार ऊं उड़ता थकां ऐ जहाज न्यारा-न्यारा करतब बतावण सागे तिरंगा रा केसरिया, सफेद अर हरा रंग रा फॉर्मेशन मांय उड़ेला। ध्यानजोग है के 14 सितम्बर ताई चालण वाळा ई युद्धाभ्यास मांय भारत सागे अमरीका, जापान, ग्रीस, सिंगापुर, ऑस्ट्रेलिया अर यूई री वायुसेना री टुकडियां सिरकत कर रही है।

00000

एनीमिया मुक्त राजस्थान कार्यक्रम रा तहत प्रदेश मांय आज न्यारा-न्यारा कार्यक्रम राखी ज्यी। जोधपुर मांय केंद्रीय संचार ब्यूरो, री ओर ऊं धवा पंचायत समिति मांय सही पोषण-देश रोशन नहीं रहे कहीं कुपोषण मुद्दा माथे संगोष्ठी राखी ज्यी। ई दौरान पोषण रा महत्त्व रा बारा मांय जाणकारी दीरीजी अर महिलावां ऊं संतुलित अर पौष्टिक भोजन लेवण री अपील करी ज्यी। कार्यक्रम मांय पोषण, बालपणा मांय ब्याह रोकण अर महिलावां री हिफाजत ऊं जुड्या कानूनां रा बारा मांय जाणकारी दीरीजी। सवाईमाधोपुर मांय महिलावां, आस वाळी लुगाइयां, दूध पावण वाळी मायडां अर किशोर उम्र री टाबरियां री हीमोग्लोबिन री जांच कर आयरन की दवाइयां दीरीजी। ई मौके मौसमी बीमारियां ऊं बचाव र बारा मांय ई जाणकारी दीरीजी। झालावाड़ मांय उप मुख्य चिकित्सा अर स्वास्थ्य अधिकारी डॉ. अरविन्द कुमार नागर आंगनबाडी केन्द्र रो दौरा कीनो।

0000

पाली जिला रा सोजत मांय राष्ट्रीय पोषण माह रा तैत उपखंड कार्यालय ऊं जागरूकता रैली निकाळी ज्यी। ई दौरान आंगनबाडी कार्यकर्ता, सहायिका अर आशा सहयोगिनियां लोगां ने पोषण, खून री कमी, टीका लगावण अर न्यारी-न्यारी सरकारी योजनावां रा बारा मांय जाणकारी दीनी। कोटपूतली-बहरोड मांय ई पोषण माह रा तैत महिला अर बाल विकास विभाग री ओर ऊं खास कार्यक्रम राखी ज्यो।

00000

सवाईमाधोपुर जिला मांय सगळा स्वास्थ्य केंद्रां री जियो टैगिंग करी जा रही है, जिण ऊं सगळा केंद्रां री असरदार तरीका ऊं निगराणी करी जा सकेला। सी.एम.एच.ओ. डॉ. धर्मसिंह मीना आ जाणकारी दीनी। वे बतायो के जिला मांय 224 मांय ऊं हाल ताई 186 संस्थानां री जिओ टैगिंग कर दीरीजी है।

00000

हनुमानगढ़ जिला रा गोगामेड़ी मांय भर रह्या पशु मेळा मांय ई दफा 3 हजार 7सौ ऊं बत्ता ऊंट बिक्री सारू लायी ज्यी है, जो लारला साल री तुलना मांय बत्ती है। मेळा मांय राजस्थान, हरियाणा, उत्तरप्रदेश, अर पंजाब राज्यां अर केन्द्र रा राज वाळा जम्मू-कश्मीर ऊं ऊंट लायी ज्यी है। पशुपालन विभाग ऊं मिली जाणकारी रे मुजब हाल ताई 972 ऊंटों री बिक्री व्हे चुकी है। मेळो 18 सितंबर ताई चालेला।

000000

जैसलमेर जिला रा रामदेवरा मांय बाबा रामदेव रो मेळो 5 सितंबर ऊं सरू व्हेला। इण मांय शिरकत करण सारू मोटी तादाद मांय पैदल जातरू पूग रह्या है। जातरूआं सारू भोजन, पाणी अर ईलाज रा सुबीता मुहैया करावण री सगळी जरूरी व्यवस्थावां करीजी है। रेलवे ई मेळा मांय शिरकत करण बाबत् आवण वाळा जातरूआं रा सुबीता सारू जोधपुर ऊं आशापुरा गोमट टेशन

ताई खास गाड़ी चलावण रो ऐलाण कीनो है। ई रे अलावा भगत की कोठी टेशन ऊं रामदेवरा सारू दो मेळा स्पेशनल रेलगाड़ियां पैली ई चाल रही है।

0000

प्रदेश मांय चौमासा री चौखी बिरखा रो दौर लगातार चाल रह्यो है। लारला 24 घंटा मांय बांसवाड़ा जिला रा भूंगड़ा मांय सब ऊं बत्ती 115 मिलीमीटर बिरखा व्ही। डूंगरपुर अर उदयपुर मांय ई कटे-कटे जोरदार बिरखा व्ही। आज हनुमानगढ़, श्रीगंगानगर, लालगढ़, करणपुर अर गजसिंहपुर मांय चोखो मेह बरस्यो। सीकर अर फतेहपुर मांय ई जोरदार बिरखा रा समाचार है। सिरोही जिला मांय माउंट आबू समेत न्यारी-न्यारी ठोड़ां बिरखा व्ही। चूरू मांय दोपहरां पाछे बिरखा व्ही। राजसमंद मांय व्ही बिरखा ऊं नदी-नाळा मांय पाणी उफणबा लाग्यो है। उदयपुर मांय व्ही बिरखा पाछे उदय सागर रा चार दरुजा खोल दिया ज्या है। बांसवाड़ा रा माही बजाज सागर बंधा रा ई चार दरुजा खोल र बत्तो पाणी निकाल्यो जा रह्यो है। संभागीय आयुक्त डॉ नीरज के पवन पूजा-अर्चना कर र ऐ दरुजा खोल्यो। 281 दशमलव 50 मीटर बूता रा माही बजाज सागर बंधा मांय 280 मीटर ताई पाणी भर ग्यो है। जैसलमेर शहर, चांधन अर रामगढ़ मांय ई चोखो मेह बरस्यो। बालोतरा अर नीम का थाना मांय आखा दिन बादळा मंड्या रह्या। ई बीचे अजमेर मांय ई साल अगस्त महीना मांय व्ही 475 दशमलव 4 मिलीमीटर बिरखा व्ही जो 69 साल मांय सब ऊं बत्ती है। मौसम केंद्र जयपुर आवता चार-पांच दिन कोटा, भरतपुर, अजमेर, उदयपुर अर जयपुर संभाग मांय बिरखा रा आसार जताया है।

00000

पेरिस मांय चाल रह्या पैरालंपिक खेलां रा छठा दिन आज निशानेबाजी होड़ मांय भारत री अवनी लेखरा 50 मीटर राइफल थ्री पोजिशन एसएच-1 श्रेणी मांय फाइनल मांय पूग ग्यी है। फाइनल मुकाबलो अब ऊं थोडी देर पछे सिंज्या सात बज्यां सरू व्हेला। महिलावां री रिकर्व तीरंदाजी होड़ मांय भारत री पूजा क्वार्टर फाइनल मांय पूग ग्यी है। वां रो सामो रात नौ बज र 20 मिनट ऊं चीन री वु चुनियन ऊं व्हेला। महिलावां री शॉटपुट होड़ मांय भाग्यश्री जाधव पांचवी ठोड़ माथे रही। पुरुषां री ऊंची कूद रा टी-63 फाइनल मांय मरियप्पन थंगावेलु, शैलेश कुमार अर शरद कुमार चुनौती पेश करेला। पदक तालिका मांय भारत सोना रा 3 तमगा समेत कुल 15 तमगा जीत र 15वीं ठोड़ माथे है।

00000